

PETRI POTOCHII

2

A. D.

INVICTISSIMUM
POTENTISSIMUMQUE
PRINCIPEM
VLADISLAVM
SIGISMUNDVM
POLONIAE ET SVECIAE
REGEM
ORATIO GRATVLATORIA.



ANTVERPIÆ,
EX OFFICINA PLANTINIANA
BALTHASARIS MORETI.
M. DC. XXXIII.

THE UNIVERSITY OF CHICAGO

LIBRARY

OF THE

PHYSICAL SCIENCES

AND

ENGINEERING

DEPARTMENT OF

PHYSICS

CHICAGO, ILL.



1911

NOV 10

1911

PETRI POTOCII
 A D
VLADISLAVM
SIGISMVNDVM
 POLONIAE ET SVECIAE
R E G E M
 ORATIO GRATVLATORIA.



I quando Sarmatia nostra, ob datum sibi à Deo immortali Regem, pium, fortem, iustum, & sapientem, meritò lætabatur; tum hoc tempore potissimum gaudere & lætari summoperè debet: quo te nimirum, VLADISLAE SIGISMVNDE, REX INVICTISSIME, dextro Numinum favore moderatorem sortita est, omnibus ita Heroicis virtutibus præditum, vt non modò immortalia antecessorum tuorum facta

adæques , verùm etiam longissimè antecel-
las. Post magnos etenim illos Reges , VLA-
DISLAI atque SIGISMVNDI nomine insignitos,
quartus tu in numero Regum nostrorum,
& VLADISLAVS simul & SIGISMVNDVS nume-
raris : qui vtriusque nominis significationem
re ipsâ præstans , & mundi dominatorem seu
apicem , & armorum gloriâ potentem , glo-
riæque te immortalis cupidum claris facino-
ribus monstras. Omissis siquidem VLADIS-
LAIS illis, qui Principes Poloniæ tantùm, non
Reges coronati fuère , primus erat VLADIS-
LAVS diademate reuinctus ille , qui in corpo-
re exiguo magnum animum gerens, LOCTI-
CVS, id est cubitalis, à staturâ breui ; Magnus
verò Sarmatarum bellator , à rebus strenuè
& feliciter gestis, in Historiis nostris appella-
tur. Alter fuit VLADISLAVS IAGELLO ; qui ex
Magno Duce Lituaniæ , Rex Poloniæ crea-
tus, præter res domi forisq̃ præclare gestas,
ob eximiam in conuertendâ ad CHRISTVM
Lituaniâ atque Samogitiâ sollicitudinem &
zelum , gentis suæ Apostolus nuncupatus
est. Tertius verò eius filius, VLADISLAVS IA-

GELLONIDES ; qui non modò sceptri ac nominis, sed & virtutum paternarum heres, ob egregiam fortitudinem Hunnico quoque Imperio potitus, æneum sese murum Crucis CHRISTI hostibus opponens, Sarmaticam gloriam auxit, vnà cum sanguine spiritu in acie Varnensi effuso. E SIGISMUNDIS verò, primus ob diuinam quamdam in administrando Regno sapientiam DIVVS ab obitu appellatus. Alter ob ingentem rerum prudenter gestarum cumulum, AVGVSTVS à ciuibus suis acclamatus. Tertius denique Pater tuus, præter gubernatam feliciter pace bellòque Rempublicam nostram, ob singularem in Deum Diuósque pietatem ac religionem, meritò PII cognomen consecutus est. Ab his tu Principibus, REX SERENISSIME, & nomina & sanguinem deriuatum habens, sic te hætenus gessisti, vt & LOCTICI in rebus arduis aggrediendis magnanimitatem, & IAGELLONIS senioris in religione propagandâ ardorem, & eius filij in contemptu periculorum eximiam fortitudinem, & SIGISMUNDI Primi in gubernando

Regno admirabilem sapientiam , & AV-
 GVSTI AVI TVI in tuendâ Maieſtate ſplendo-
 rem , & DIVI PATRIS TVI in rebus gerendis
 felicitatem, egregiâque pietatem in DEVM,
 nondum coronis ornatus , ciuibus tuis lucu-
 lenter declaraueris. Cûmque nunc ſcep-
 tris paternis admotus , ſingularia quotidie virtu-
 tum Regiarum exempla tradas, iuſtitia, pru-
 dentia, moderationis, liberalitatis, fortitu-
 dinis, clementia; facile omnibus perſuades,
 quid in poſterum abs te ciues tui exſpectare
 debeamus. Vt igitur ingentis lætitiæ noſtræ,
 quam meritò ex tuâ inauguratione concep-
 imus, ad alios quoque remotiùs à nobis poſi-
 tos ſigna deueniant; & vt iterùm ſtrenuos il-
 los fortèſque VLADISLAOS, & ſapientia gloriâ
 pietatèque magnos SIGISMVNDOS in te re-
 uixiſſe, omnes agnoſcant; enitar, cum bonâ
 TVÆ MAIESTATIS veniâ, de tuis virtutibus;
 REX SERENISSIME, paullò vberius diſſerere:
 quamuis eas nemo non dico exæquare ver-
 bis, ſed ne cogitatione inueſtigare valeat; ea-
 rumque famâ & fructu plenus iam ſit orbis
 Sarmaticus, plenus orbis terrarum.

Virtutis

Virtutis itaque cuiusvis eminentioris, REX SERENISSIME, ea est dignitas, eaque pulchritudo, ut cultores suos non solum in hac mortali vita verè beatos, verè felices, atque illustres efficiat; sed post funera etiam nominis perpetuitate, ac optimæ famæ immortalitate donet, eamque ad omnem posteritatem maximâ cum gloriâ transmittat. Vnde quoque illi, qui altiori in dignitate Regiôque in folio positi sunt, singulari eius amore & pulchritudine ducti, non modò utilitates quasvis & voluptatum illecebras contemnunt; sed mortis ipsius periculis spretis, quæque etiam ardua, quæque difficilia, fortissimo animo aggrediuntur: Résque publicas sibi commissas prudentissimè administrant; cum rectè factorum gloriam non secum mori, sed ita memoriæ mandari vident, ut tum maximè diuturnioris illam vitæ initium sumere, affirmare possimus. Tales profectò cum plures alij Heroes in mundo fuère, tum maiores tui, REX SERENISSIME, in Septentrione, antecessorésque gloriosissimi Reges Poloniae omnes; quorum tu exemplis innixus,

xus, in iuuenili adhuc ætate ea didicisti, quæ tibi ad Regnum, atque immortalitatem, viam amplissimam pararent. Et Alexander herclè Seuerus Imperator ita à pueritiâ bonis artibus, tam ciuilibus quàm militaribus, dicitur fuisse institutus, vt ne diem quidem vnum transire sine litteris aut militari disciplinâ sineret, matre suâ Mammæâ procu-
rante, quæ ei nobilissimos quosque præceptores adhibuit. Tu econtrâ, matre virilis prudentiæ feminâ, imò AVSTRIACÆ DOMV innatâ sapientiâ præditâ Heroinâ, in pueritiâ orbatus, à Diuo patre tuo SIGISMVNDO Rege; omnium Septemtrionalium sapientissimo, sollicitâ curâ educatus, præceptis imperandi institutus, exemplisque rerum ab eo gestarum firmatus, non modò mitiores artes & scientias, pro Regiâ tuâ indole, sub optimis præceptoribus imbibisti; sed militaribus quoque disciplinis, inter bellicosos tuos Sarmatas, facillimè assuesti: ostendisti-
que, omnibus cursum ætatis non esse expectandum in festinatione virtutis. Et quidem rectè: vt enim mentis, siue ingenij, & corpo-

ris munia in homine inuicem copulantur; ita arma quæ ad corpus, & litteræ quæ ad ingenium referuntur, in Principe coniungi debent. qui armis profectò vim à suis repellere, vlcisci iniuriàs, inimicos profligare, socios amicósque defendere, tueri fines, propagare Imperium solet: litterarum verò præsidio instructus, leges subditis tradere, iura præscribere, mores corrigere, ciuiúmque animos quocumque lubet impellere atque incitare potest. In his autem omnibus, cum præcipuè canâ prudentiâ sit opus, tum idcirco eam rectissimè imperantium virtutem propriam esse Philosophi dixerunt: quòd videlicet, præ aliis mortalibus, eâ instructi, quid petendum fugiendúmve sit, optimè cognoscere valeant; & quibus viis, tum ipsi eò peruenire, tum subditos suos eòdem perducere commodissimè possint; nihilque temerè atque inconsideratè in Republicâ agere, sed vnoquoque in negotio, quid rerum varietas & necessitas, tum pacis tum belli tempore, postulet, per se diiudicare. Hinc tu VLADISLAE, Optime Maximéque Prin-

ceps , quamuis longo vsu sub patre tuo sapientissimo Rege didiceris , tot res , tamque varias , mente concipere , ratione disponere , diligentia obire , sapientia gubernare : non contentus tamen domesticâ disciplinâ & tractatione negotiorum , voluisti externæ etiam prudentiæ modum & momenta inuestigare ; atque eam ob causam , nobilissimas Europæ gentes , scientissimósque bellicæ rei populos auidè perlustrare . Nec vano mehercle peregrinationis scopo . Recreat enim attollitque generosum animum , quotidiana illa conspecta nouitas , morum , hominum , locorum ; & ad similia domi efficienda , recordatis speciebus rerum , validissimè impellit . Sempérque hoc egregiis Heroibus tum ad gloriam magnificum , tum ad benè viuendum salutare , tum ad gerendum Imperium conducibile visum , lustrandis diuersis Prouinciis , & in multorum Regum notitiam beneuolentiâque venire , & plurimarum rerum vsu Vlyssæam quamdam , hoc est viuam , parare sapientiam . Inter reliquos autem æstimatæ prudentiæ Principes , Aurelianus ,

reliandum, Vespasianum, Titum, Traianum, atque maximè Adrianum Imperatorem, Spartianus auctor est, peregrinationibus impensissimè delectari solitum; adeò, vt quidquid in libris legisset, id oculis coràm intueri concupisceret. Marcum quoque Tullium, eloquentiæ Latinæ parentem, peregrinationibus deditum, Athenis cùm esset, non tam operibus magnificis, exquisitisque antiquorum artibus delectatum fuisse aiunt, quàm recordatione summorum virorum, vbi quisque habitare, vbi sedere, vbi disputare sit solitus. Sic tu, VLADISLAE REX, cùm externas gentes Prouinciâsque peragres, non magnificas nobilium ædes, non superba Dynastarum palatia, nec marmorum ingentes substructiones mirabaris; sed loca summorum olim virorum habitatione illustrata, rebus fortiter gestis clara, bellicisque tumultibus infamata: diligentérque percunctabaris de locis ad præscripta Geometrica extructis, de vrbibus optimè munitis, de arcibus inexpugnabilibus, de Ducibus bellorum, de armamentariis Regum, de strenuis militibus, de

viris eruditis , eorúmque scriptis , & factis
præclaris ; quò inde tibi maiorem rerum
cognitionem , regnandíque scientiam abso-
lutissimam comparare possis. Quòd si verè
itaque Sophocles scripsit, Megistanas sapien-
tum congressu prudentes euadere ; te, VLA-
DISLAE REX SERENISSIME, omnium pruden-
tissimum censemus esse: cui nimirum conti-
git cum tot Principibus congredi , cum tot
colloqui eruditis, cum tot Magnatibus con-
uiuere : tot gentium, ciuitatum, familiarum,
linguas , cultus , ingenia , mores , instituta,
spectare : atque vnà tuam vniuersis monstra-
re virtutem , indolem , ac fortitudinem il-
lam Sarmaticam, quam in iuvene adhuc ex-
timuit Moscus , persensit Othomanus , ex-
pertus est suo malo Getes , suo damno Su-
dermanus. Itaque tanti per Germaniam,
Belgium , atque Italiam vniuersam concur-
sus hominum excitabantur , cùm ad Portæ
Aureæ apertionem religiosus Romam ires,
tantæ ex oppidis effusiones , tantæ consalu-
tationes, vt nihil aliud videre esset, nisi singu-
lis diebus recentes ciuitatum occurfus , no-
uas

uas Principum legationes, assiduas Optimatum pompas, Præsulorum & populi faustas ubique apprecationes. Idque eâ vniuersorum, quaquâ incesseras, in te obseruantiam, ac eo amore, vt vehementissimum, supra quàm dici possit, tui desiderium omnibus illis nationibus & populis reliqueris. Quare, cùm te in patriam recepisti, omnes Sarmatæ tui in te oculos conuerterunt. In te enim non modò præscorum illorum VLADISLAORVM & SIGISMVNDORVM, huius eiusdem Reipublicæ, vt iam diximus, olim gloriosissimorum Regum, imaginem impressam intueri videbantur: sed sibi in animum inducebant, te non modò maiores tuos omnes, & DIVVM patrem tuum æquaturum, sed longo etiam interuallo vniuersos Regni Poloniæ Reges superaturum; vbi primùm contingeret te ad ea Regni sceptræ & coronas accedere, quas illi magnâ cum prudentiâ & felicitate gesserunt, & quas tibi ob virtutem fatis destinatas cuncti præuiderunt. Quid enim aliud ab illâ tuâ adolescentiâ religiosè, innocenter sanctèque ac sapienter exactâ expectari po-

terat ? Quid ab virili ætate istâ ? cui naturâ
insitum atque innatum videmus , præclara
semper ac magnifica animo concipere , ar-
dua ac excelsa moliri , & in maximis rebus,
primis ab annis ad hæc vsque tempora ver-
fari ; omniâque sic ad laudem ac dignitatem
referre , vt & apud tuos Polonos , & apud
quasuis exteras nationes, summæ virtutis ad-
mirationem obtineres , dignûsque habereris
cui sceptrâ paterna crederentur : hæcque ip-
sa Sarmatia , patria tua , fortissimorum ac sa-
pientissimorum hominum feracissima , quæ
te genuit , quæ te aluit , te sibi Regem vide-
ret ac moderatorem ; gauderétque se miseris
his temporibus , & in hac ferè totius Euro-
pæ calamitate , eum sibi filium genuisse , sub
cuius Imperio ac præsidio ab omni esset peri-
culo quàm tutissima. Nam cùm duo sint,
REX SERENISSIME , quæ claros Principes ac
Imperatores faciant , summa virtus , summâ-
que felicitas : in te vtrumque abundè Polo-
ni tui experti sumus ; qui inuictum animi tui
robur , orbi pænè vniuerso , monstrare cu-
piens , adolescentulus ferè Mosci glaciem

ac hiemes fregisti, cælúmque illud sæuū,
 asperum, immite, cum virtute incolarum,
 exarmasti; & quæ aliis ob siderum & loco-
 rum inclementiam videbantur inaccessibi-
 lia, tuâ fortitudine & constantiâ superasti,
 penetraſti, expugnaſti: ingentémque illum
 Smolenscensis ditionis tractum Seuerien-
 sem, atque Czerniehouienſem Prouinciā
 vniuerſam, ſuperbo illi Moſcorum Tyran-
 no eripuisti. Pari deinde animi magnitudi-
 ne, & Turcarum etiam potentiam, & Scy-
 tharum ferocitatem bello Valachico exce-
 pisti; vt illâ victoriâ tuâ Chotimensi, quam
 omnes annales, omnes poſteri loquentur,
 non Polonia ſolū ſeruitute ſit liberata, ſed
 omnibus Chriſtianis populis ſecuritas reſti-
 tuta. Quæcumque enim natio barbarorum
 robore, ferociâ, aut numero grauis vñquam
 nobis, ac Europæis omnibus fuit, quaſi fato
 aliquo ad ſupplicium condemnata tuæ feli-
 citati tum ſuccubuit; innumeræque ſimul
 Mahometanorum gentes ad bellum illud
 coactæ, tuâ virtute caſtigatæ, timendum eſ-
 ſe Polonum in poſterum didicerunt. Vt au-
 tem .

tem æui maturus , Patre tuo iam senio fatifcente , ea comprobares , quæ illo adhuc florente adolescentulus fortiter gesseras ; declararésque te haud dissimilem esse tui , sed semper paratum pro patriâ próque Catholicâ religione quæuis pericula subire : ideò in Prussiam quoque ab eo in commilitium assumptus , ne aut virtus quiete languesceret , aut parum dignus Regno fuisse videreris , qui omnino futurus esses Sarmatiæ Imperator , quasi priuatus sub imperio inter ciues tuos versabaris ; non alio sanè maior , nisi quòd virtute instructior , laboris tolerantior , atque rerum militarium peritior. Et quamuis conditione supra leges & parendi præscripta esses , attamen paruit in te semper cupiditas rationi , voluntas legibus , maiestas suasionibus monentium : & actionum splendore , morum nobilitate , modestiâ , ac humanitate omnibus antecelluisti : omniúmque tibi ciuium amorem , tuâ comitate , tuâ virtute , ita comparasti , vt nemo tam magna de te animo conceperit , quin tu multò maiora præstiteris. Nec iniuriâ profectò : decet enim
magnos

magnos animos & sublimem fortunam lenitas; nec cadere potest, nisi in eos qui ingenui sanguinis & stirpis sunt: procul ab eâ viles homines aut barbari, qui plerumque sæuire consueverunt, vbi licentia adest; aut superbire, vbi fortunæ fauor. Cùm itaque omnes homines deceat se submittere, & ab arrogantia fugere, scopulo virtutum; tum maximè Principem, qui in alto est, & causas plures siue occasiones superbiæ atque fastus habet. A quo tu, REX SERENISSIME, longè positus, nec austerus vñquam aut tetricus, aut difficilis tumidusve, sed hilaris semper, comis, facilis, modestus, & omnibus benignus, sic iustitiæ studio, quæ mater omnium virtutum est, assidue flagrabas, vt omnium bonarum actionum norma ac regula tuis Polonis esses. In negotiis siquidem suis, ad tuum patrocinium recurrentes, tuum expectantes iudicium, cunctos eodem iustitiæ lumine æquè spectabas, pari libræ lance omnium actiones & merita pendebas, gnarus fundamentum perpetuæ commendationis & famæ iustitiam esse; sine quâ nihil

C potest

potest esse laudabile. Quapropter tuas eximias dotes, tuum vitæ tenorem considerantes, faciliè coniectabant omnes, te olim Sarmatiæ tuæ gubernacula moderaturum., te folium paternum & coronas virtute affecuturum: felicemque ac beatam Poloniam futuram, cùm tu illi Rex præfueris. Quid iste tuus Diuinus & Maiestate plenus adspèctus? quid vultus & facies Regia? nōne omnes, qui intuebantur, ad quæque maxima de te speranda incitare videbatur? Si Oratores externorum Principum, Diuo patre tuo conspecto, sæpissimè obmutescabant, cùm proloquendum esset; quid tuam Heroicam faciem barbari populi non extimescent, cùm iam in throno Patris residentem conspiciant; cui tu non tantùm formâ, sed & virtutibus perquàm simillimus exsistis? Vt sileam interim istos humeros & decentissimam proceritatem; ista latera, virésque quibusuis obeundis muneribus pares; ac totam corporis formam, ex amabili quadam venustate pariter ac maiestate temperatam: quasque geminòs vultus, Martis atque Apollinis, in
vnâ

vnâ facie sic repræsentantem, vt neque gratia minuât reuerentiam, neque dignitas officia gratiæ. Istiusmodi figuram Achilli affinxit Homerus, Aeneæ Virgilius: talem Scipioni Africano tribuunt Historiæ: quam sic augustam esse voluerunt, vt eo nihil fuerit amabilius; sic rursus amabilem, vt nihil augustius. Titum quoque Imperatorem, & formâ excellenti præditum, & virtutibus Heroicis ornatum, & occultâ quadam gratiâ cælitus donatum, ita omnibus venerabilem pariter atque amabilem fuisse prædicant, vt Orbis amor ab omnibus esset appellatus. Sed hoc elogium in neminem veriùs quadrat, quàm in te, REX SERENISSIME, qui commune es omnium Septemtrionalium populorum gaudium, vnica sæculi tui delicia, fatalis Principum Christianorum amor. Quis enim te vidit vmquam, qui non illicò amare cœperit? imò quem non vel auditum modò VLADISLAI nomen in tui cupiditatem accendit? Quis vel eorum qui populares auras, epulis, muneribus, congiariis, sportulâ venabantur, tam gratiofus fuit vni multitu-

dini , quàm tu tam multis nationibus , tam innumeris Europæ gentibus , maximè autem tuæ Sarmatiæ incolis ? Non efficacius magnes chalybem attrahit , quàm tu mortaliùm omnium mentes in tui amorem rapis : nec tam facilè vicina flamma ad naphtham transuolat , quàm facilè tu, VLADISLAE REX , in omnium ciuium tuorum pectora descendis. Nullùmque vmquam memorià hominum Principem exstitisse credo , quem sua patria dilexerit aut sincerius , aut ardentius : quique inuicem suos impensiùs amarit. Et quidem iure : singulorum siquidem in te beneuolentiam amore compensas , liberalitate rependis , beneficentià retribuis : tuàque, REX SERENISSIME , moderatio , clementia , comitas , benignitas , pietas , adeò omnem dominatus inuidiam excludit , vt nullus vmquam in priuatâ vitâ tantam apud omnes gratiam fauorémque obtinuerit , quantum tu in Regno amplissimo obtines. Obtines autem meritissimò ; quia nullo commodius philtro amor acquiritur & retinetur , quàm ipso amore , apud liberam præsertim gentem :

gentem : bonúmque Principem decet sua omnia posteriora habere , patriæ commoda prima & maxima ducere ; & vt ea opibus firma, copiis locuples, gloriâ ampla, virtute honesta sit , quàm diligentissimè curare. Nam *Rex eligitur*, inquit Socrates, *non vt sese molliter curet ; sed vt per ipsum , ij qui elegerunt , benè beateq; agant.* Hinc Principis munera sapientes esse putant , pudicitiam non constanter modò seruare , sed etiam in aliis vindicare : grauitate citra Regium supercilium vti ; adeuntes ac supplices , non solùm comiter excipere , sed confirmare , atque ad meliorem spem reuocare : iustitiam admirabili condire clementiâ : disceptationes dexteritate incomparabili sedare : populorum & ciuium saluti ac securitati consulere ; bonisq; artibus Regna instruere : efferatos animos emollire : benè educatis ingeniis fauere : litteratos vndecumque accersere , eosque omni munificentia honestare. Quod enim animus est corpori, quod Sol orbi terrarum , hoc est populo suo bonus Princeps : nam *omnium somnos*, vt inquit Seneca , *illius vigilantia defendit , omnium otium illius*

labor, omnium delicias illius industria, omnium vacatio-
nem illius occupatio. Cùm te igitur, SERENISSIME
REX, subditi tui videremus sanctitate, reli-
gione, consilio, prudentiâ, humanitate, for-
titudine, iisque omnibus virtutibus orna-
tum, quibus optimum Principem prædi-
tum esse oportet; nemini mirum videri de-
bet, quòd te, quem certa siderum decreta
sceptro Poloniæ & solio destinauerant, ab
obitu SIGISMUNDI patris tui, optimi atque
sanctissimi Principis, vnanimi consensu, li-
beris suffragiis, in Regem nostrum elegeri-
mus; téque libertatis nostræ vindicem, at-
que legum tutorem nuncupauerimus. Vn-
de nemo quoque tam stupidus vel invidus
reperiri potest, qui abs te non omnia bona
speret; déque te sibi, REX VLADISLAE, om-
nia summa non polliceatur, si modò aut ge-
nus tuum, vnde originem ducis, aut Patrem
tuum, quem in omnibus imitaris, aut deni-
que te ipsum, qui omnibus Regiis virtuti-
bus abundas, sibi proposuerit. Nam quoad
genus diuinamque originem tuam: etsi pul-
chrum duxisti, REX SERENISSIME, tot tibi
tanto-

tantorúmque Regum è tuâ profapiâ virtutes, veluti faces accensas, præluxisse; tamen non alienis vestigiis nixus, sed tuo ingenio tuisque virtutibus creuisti, tuis meritis, tuis laboribus, viam tibi aperuisti ad istud fastigium, ad quod nunc es euectus; cùm minùs decorum esse putares, solis maiorum laudibus censerì, & illustribus auorum monumentis vmbrailem gloriam venari. Præstant etenim & pluris æstimantur, quæ in te ipso sunt, quàm quæ circa te exterius versantur: quia hæc propria & ingenita sunt, illa externa & aliena habentur. Quantum verò ad Patrem tuum, inuictum illum atque indomitum Heroem, quem imitandum tibi proposuisti; nihil penitus in ipso desideratum est, quod in optimo esse deberet Rege, siue scientiam rei militaris, siue virtutem, siue maiestatem, siue felicitatem spectare voluerimus: sufficitque vno verbo dixisse, vnum illum sæculo hoc nostro diuinitus existitisse, in quo virtutes simul omnes vigerent, quæ singulæ in omnibus prædicantur. Quantum denique ad te ipsum, REX SERE-

NISSIME,

NISSIME, talem te ab incunabulis vsque præstitisti, taléque Magni ac heroici animi specimen dedisti, vt in tractandis Reipublicæ negotiis SAPIENTISSIMI ac PRVDENTISSIMI REGIS nomen, non ciuium tuorum modò, sed omnium vicinorum populorum consensu promerueris: bellicis verò in rebus cum omnibus omnium ætatum eximiis Ducibus, ac Imperatoribus, facilè conferri possis. Siquidem te iampridem, vt & Patrem tuum, barbari formidare didicerunt: & vt in eius sarcophago titulis addita cognomina, DACICI, SCYTHICI, MOSCOVITICI, OTTHOMANICI, leguntur: sic tu sub eius auspiciis arma gerens, tantum orbi ostendis vniuerso triumphorum, quantum tota Sarmatia habet hostium aut maleuolorum. Quis enim te, VLADISLAE PRINCEPS MAGNANIME, vel bello, vel pace clarior? quem res aduersæ magis exercuere? quis prosperis & secundis minùs intumuit? quis in utrâque fortunâ constantior fuit? quis tam eximiis dotibus ditatus, vt solus possit Rempublicam in his fluctibus Interregni consilio iuuare, auctoritate

tate munire , prudentiâ fouere , dignitate augere? Nemo sanè præter te, REX SERENIS-
SIME, qui ab ineunte ætate , vti diximus , in
vniuerso vitæ cursu , tanti Imperij fastigio te
dignum præstitisti : & non bellicis modò,
sed pacis quoque artibus , quæ semper &
vbique sunt vsui , excelluisti ; atque ciuium
tuorum amorem iis tibi conciliaisti. Tuâ et-
enim ope recreatam videmus Poloniam, tuâ
virtute defensam Lituaniam, tuis armis bar-
barorum ereptam iniuriæ Russiam, tuis con-
siliis sedatam dissidentium de Religione opi-
nionem & discordiam , tuâ auctoritate re-
pressam licentiosorum hominum audaciam,
erectam in spem Prussiam , restitutam deni-
que omnibus Sarmatici Imperij Prouinciis
securitatem & pacem. O fortunatam itaque
te Rege Poloniam nostram ! ô verè aureum
hoc nostrum sæculum , quo te auspice , te
auctore , te moderatore , pietas , fides , sim-
plicitas , pudor , breuiter , omnis illa incor-
ruptæ quondam ætatis virtutum seges re-
pullulascit , reuiuiscit , efflorescit ! O nos tér-
que quaterque felices ! quibus Diuino mu-

D nere

nere talis datus est Princeps, talis Rex, qualem ex omni mortalium numero ne votis quidem optare potuissimus meliorem: tam fortunatus, ut bello nusquam succubuerit: tam potens, ut nulli vicinorum non sit formidandus: tam mitis, ut nulli non sit amabilis: tam comis, ut cuius civium pateat aditus: tam benignus, ut neminem à suo sermone tristem discedere patiatur: tam munificus, ut omnes benè de patriâ meriti præmia ab ipso referant: tam incorruptus, ut eum sibi amicum mali sperare non queant: tam beneficus, ut optimus quisque probatus illi charusque sit: tam iustus, ut ad regimen & disciplinam sine legibus ullis eius vnus vita sufficiat: sic denique omnibus fortunæ, corporis, animi bonis, vndiqueque cumulatus, ut Numini quàm homini propior esse videatur. Atque hæ sunt dotes illæ tuæ, VLADISLAE REX SERENISSIME, quæ te Superis charum reddunt. Hæ virtutes Regiæ, quæ tibi tam inauditum fortunæ fauorem, quæ tibi Principes Christianos, quæ nationes populósque confines, quæ mortales

les vniuersos conciliant. Quapropter gratulamur huic tantæ tuæ felicitati ; gratulamur Reipublicæ nostræ , cui tu , talis ac tantus Rex , Diuinâ prouidentiâ datus es , vt illam his tuis virtutibus facilè tutam securamque præstiturus sis. Gratulamur quoque nobis ipsis , hoc est , afflictæ patriæ nostræ ; ac præcipuè Podoliæ , Pocutiæ , Vkrainæ , totiûsque Russiæ Prouinciis , quas tu , VLADISLAE REX SERENISSIME , pænè ab interitu ad vitam reuocasti , viribus firmasti , auctoritate munuisti. Et vt antea ab Osmani Turcarum Tyranni impressione , sic nunc à Tartarorum incurfu , & Cosacorum tumultuosâ licentiâ defendisti. Ex quo in posterum etiam animis præsentire iuuat , quantarum rerum gloria maneat , quantis augendus sis titulis , quos olim ex impiis Mahometanis relaturus triumphos , quæ fixurus ex immani illâ barbarie spolia , quàm latè Sarmatici Imperij fines prolaturus , quàm felicibus momentis publicum sæculi tui statum in melius commutaturus. Atque hoc omine Respublica vniuersa commota , hoc Prouinciæ

figillatim , tanto ac tam immortali beneficio deuinctæ , eundem te Dominum & Regem habere decreuerunt , quem habebant assertorem & vindicem suæ libertatis. Tibique omne obsequium , omnem venerationem , omnem submissionem Poloni tui pollicemur , & debemus ; sumúsque parati etiam vitam ipsam & sanguinem , vbi opus sit , pro incolumitate & dignitate tam SACRÆ MAIESTATIS TVÆ , quàm totius Reipublicæ nostræ , profundere : quandoquidem *ipsâ naturali lege , non minùs patria nascimur , quàm parentibus ,* vt inquit Vlpianus. Ceterùm Deum felicitatis omnis auctorem , Diuósque Poloniæ Tutelares , comprecamur , ne quid hæc promptitudo nostra , vel tuo capiti , REX SERENISSIME , vel patriæ nostræ conciliet inuidiæ : sed quæcumque sunt euentura , ea non nobis solùm , sed & hostibus nostris , quoad fieri potest , fausta feliciâque faciat ; hoc est , vt victorias tuas omnes , etiam de barbaris , quàm minimè cruentas velit esse. Vtque in isto paterno solio sedens , annos omnium , qui ante te regnarunt , VLADISLAORVM SIGIS-

MVNDORVMQVE procul excedas ; quò vide-
licet Sarmatæ tui , felicitatem agnoscentes
tuam , tuti vndique sub tanto Rege , & om-
ni beatitate affluentes, diutinâ securitate per-
fruemur.

D I X I.



APPROBATIO.

H*Aec Illust^{mi} atque Excel^{mi} Domini Petri Potocij, Pa-*
latinidis Braslaviensis, ad Serenissimum & Potentis-
simum Principem VLADISLAVM SIGISMVNDVM
Polonia & Suecia Regem Oratio Gratulatoria, typis diuul-
gari, atque ab omnibus legi meretur.

Gaspar Estrix Plebanus
Antuerpiensis & Li-
brorum Censor.